

von Wulf Wager

## *I ben a arm's Käferle*



I ben arg kloii, bloß 30 Millimeter groß. Bisher hend bloß ganz Wenige von mir ihrhaupt gwisst. I ben a Juchtakäfer (Eremit oder Osmoderma eremita). I hoiß so, weil i Sexualstoffe verström', dia a bissle noch Juchtaleder schmeckat. Koi Mensch hot gwisst, dass i en dene alte, enna vrfaulte Platana em Stuegerter Schlossgarta em Schmoddr leb. Aber emmer, wenn a paar a Bauwerk vrhendra wellat, wird noch mir, bzw. meine Bria-

dr ond Schweschtra gsuacht. Ond wemmr ons gfonda hot, ka mr so zemlich jeden Bau zom Stoppa bringa, weil mir send gschützt! Mir isch des recht, wenglei i sowieso net übr mei alde Platane nauseha ka. Neulich ben i mol enna en dem vrfaulta Stamm enna nuffklettert ond han nausguckt, weil do so a Jesespektakel war. Do war's laut ond hot gwaggt ond Trommla hend ghämmert ond vrstimmte Gitarra ond graußliche Altweiberstemma hend keift. Wie i nausguck, sah i, dass sich a paar Halbwilde in Schlofsäck en mein Baum zom Demonschdriera neighängt hend. Damit mir gschützt bleibet, ond dia Beem net gfällt werdat, hend se gsait.

Aber bei dem Krach ond derra O'ruah en meim Baum ond dromrom em Schlossgarta, ka's koi dr stärkste Juchtakäfer nemme aushalta. Mir hend deshalb bei dr letzshta Juchtakäfervrsammlong beschlossa, dass mr auswandrat ond erscht wieder kommat, wenn do wieder Ruah isch. Wenn se no e dr Zwischazeit bauat, kennat mir au nix drfier. Selbr schuld!

Bis a andrmol  
Ihr

Juchtakäferle  
vom Stuegerter Schlossgarta